

Sonia MORETTI
(1976)

5

In la curtalina
un calafrone ricama
u villutu
di i fiori...

*

Lascià nasce
à e mure
di a persona invecchjata
l'arba santa chì cura
e ferite macerbe
d'urticule sfidate...

*

Aghju fattu
una pruvista
di chjarasge
è l'acellu
chjirlava
scimattulitu :
cunnoscu avà
a parola « ladra ! »
in acellulingua.

*

Iss'arburu
chì m'hà cunnisciuta zitella
l'aghju cunnisciutu chjarasgiu...

*

Puliscu u pane
d'a so farina
ma mi dice u pane
ch'una memoria
ùn si sguassa
micca cusì à l'asgiu...

Cumu serà
chì a memoria
ammenti più sole
ch'è nivuli
pè issi lochi di zitellina ?
Serà chì più ingrandemu
più ingrandanu
l'ombre nostre...

*

Ùn aghju dumandatu
nunda
di ciò chì m'hè accadutu
ma vogliu tene tuttu.

Ricacciatu da MORETTI Sonia, *Puesie di a curtalina*, Ajaccio, Albiana, 2009, p.20, p.34,
p.40, p.55, p.98, p.226, p.228.